

聖門十六子書

先賢閔子傳

先賢閔子名損字子騫其先魯公族僖公元年季友請立
閔公後以其子子魯奉祀始姓閔氏子魯生澤澤生伯衍
伯衍生子建子建生子馬父子馬父初娶姜氏生損爲周
景王八年魯昭公五年歷朝從祀稱篤聖閔子居十哲首
壇閔子幼喪母爲後母所苦冬月以蘆花衣之以代絮其
所生二子則衣之以綿閔子御父車身寒失轡父察知之
欲出後母損曰母在一子單母去三子寒父善其言而止

母爲感悟孔子曰孝哉閔子騫人不間於其父母昆弟之言閔子始見於夫子有萊色後有芻豢之色子貢問曰子始有萊色今有芻豢之色何也閔子曰吾出薰葭之中入夫子之門夫子內切磋以孝外爲之陳王法心竊樂之出見羽蓋龍旂裘旃相隨心又樂之二者相攻胸中而不能決是以有萊色今被夫子之文淺深又賴二三子切磋而進之內明於去就之義出見羽蓋龍旂裘旃相隨視如朝士矣是以有芻豢之色家語曰閔子以德行著名萊子

其孝焉卒薨鵞山之南在今江南鳳陽府宿州北七十里
唐元宗開元八年從祀孔廟二十七年追封費侯宋真宗
大中祥符二年加封瑯琊公度宗咸淳三年改封費公明
嘉靖九年改稱先賢閔子

關里誌

真德秀曰閔子言行見於論語者唯四章合而言之見其
躬至孝之行辭不義之祿氣和而正言謹而確此其所以
亞於顏子而與曾子並稱也歟

子騫達者閭閻成性德冠四科孝先百行人無間言道亦

希聖公褒增封均乃天慶

宋王旦贊

通志氏族略閔氏以謚爲氏夭折而死於不道者謂之
閔孔子弟子閔損字子騫魯人望出太原又出魯國騫
氏風俗通云孔子弟子閔子騫之後以王父字爲氏

閔子書

崇川湯雲龍校刊

年表

周景王八年魯昭公五年甲子春正月閔子生於魯

閔子之先魯公族也魯自周公封魯十七世傳至閔公啟在位二年慶父欲自立使卜鮪戕之武閔僖公元年季友爲相請立閔公後以其子魯奉祀始以謚爲姓曰閔氏子魯生澤澤生伯衍爲魯大夫伯衍生子建子建生子馬父爲魯監史大夫行業著於春秋

馬父初娶齊姜氏生損生而表相奇穎二氣盈成夫
日中則移月滿則虧因名損字子騫生而至孝

庚午七歲母齊姜氏喪繼母樂氏輒苦之冬月以蘆花
衣之以代絮其所生二子曰需曰如則衣之以綿
已邈十六歲父令御車五父之衢體寒失朝父責之不
自理父察知之欲出後母跪曰母在一子寒母去三
子單遂止其後母亦改悔卒待三子如一

周敬王元年魯昭公二十四年癸未二十歲從學於孔子

因讀書汝陽之山知崇仁勵義今汝陽有閔公山焉
乙酉二十二歲從學於孔子在齊聞韶孔子至齊郭門
之外遇嬰兒挈壺方行其視精其心正其行端閔子
御孔子謂曰趣驅之韶樂方作至而聞韶學之三月
不知肉味曰不圖爲樂之至於斯也孔子適周與子
路往從之閔子始見於孔子有菜色後有粲然之色
曰聞其所不聞見其所不見吾益矣奉先思孝接下
思恭歸而事親鄉黨宗族亦稱其孝弟曰孝哉閔子

卷一
二
審故孔子曰人不間於其父母昆弟之言

周敬王十一年魯定公元年壬辰二十九歲陽虎亂閔子
曰學有四失務學不如求師與孔子退修詩書禮樂
魯論記其侍側聞聞如也先是昭公二十五年公居
長府至是魯人改作之閔子曰仍舊質如之何孔子
善其言魯人遂止故春秋不書皆閔子諷諫之力
庚子三十七歲先是公山不狃不得意於季氏因陽虎
爲亂欲廢三桓之適更立其庶孽素所善者遂執季

桓子桓子詐之得脫是以鄆自武子城之屢畔使子
路治之三月無成又使子羔治之九月無功至是公
山不狃以費畔季氏召孔子孔子欲往然亦卒不行
因使閔子爲之宰閔子辭曰如有復我者必在汶上
矣避名去之汶上越明年墮費今有避名處

己亥三十八歲生子法於汶上

乙巳四十二歲聞孔子去魯往從遊焉相遇於屯見師
已送孔子出閔子掩容作離洞雲朝天鶴之操獻之

後人名爲掩容式又從夫子適衛居十月將適陳過
匡子畏於匡去過蒲月餘返平衛主蘧伯王家

丙午四十三歲從孔子去衛適宋習禮大樹下桓魋拔
其樹閔子與顏子作而言曰可以速矣遂至陳主司
城貞子家過蒲遂適衛靈公老怠於政不用孔子孔
子行閔子執轡問政於孔子孔子曰以德以法夫德
法者御民之具猶御馬之有銜勒也人君之政執其
轡策而已故御四馬者正六轡御天下者正六官將

西見趙簡子臨河而返復在衛又如陳

丁未四十四歲子馬父致仕閔子從孔子自蔡如葉遷
於蔡

庚戌四十七歲從孔子厄於陳蔡之間絕糧七日莫能
興子貢至楚昭王興師迎孔子然後得免閔子馬父
致仕日子之事親命也無所解於心遂返魯養親

乙卯五十二歲子馬父卒年八十五閔子要絰服事曰
若是乎古之道不卽人心葬子馬父於少昊墓西邨

泗水上

丁巳五十四歲適孔子歸魯三年之喪畢見於孔子與之琴使之絃切切而悲作而曰先王制禮不敢過焉孔子曰閔子哀未盡能斷之以禮不亦君子乎與夫子刪述六經追述三王之禮於禮記最有纂訂之功孔子晝息於室鼓琴閔子聞之以告曾子入問於夫子夫子曰可與聽音矣

戊午五十五歲復去魯孔子曰從我於陳蔡者皆不及

門也記者是以列之德行之科

壬戌五十九歲孔子卒爲之服心喪三年

甲子六十一歲適周欲行孔子之道會敬王崩輒返

周元王二年魯哀公十九年丙寅自范之齊繼母樂氏卒
嘆曰孝子不匱永錫爾類蓋事親之難也見三家勝
魯如小侯作傷魯操歌曰鴻飛冥冥弋者何慕後設
教於魯衛曹滕齊宋諸國及門若曾元東郭蘭氏申
氏之徒後訂論語諸書

周定王二十年魯悼公十九年壬辰八十九歲在滕孟嘗
君請學使車往迎閔子閔子曰禮有來學無往教致
師而學則不能化君也於是孟嘗君曰敬聞命矣明
日祛衣請受業是年冬十月卒終於齊塋於華不注
山下閔子興業於魯傳道孔門得聖人之篤厚處變
而不失其常夫子稱孝焉不仕大夫不食污君之祿
氣和而正言謹而確世稱大賢後人稱之曰篤聖公
孫丑謂閔子於聖人具體而微孔鮒述夫子之言曰

德不修行不勤則閔子侍豈其誣歟

謹按史記列傳載閔子少孔子十五歲素王世紀周景王八年魯昭公五年孔子曰吾十有五而志于學是年閔子生而山東通志載於周景王之九年爲魯昭公六年時孔子十六歲矣二說雖小有異同要以史記爲斷也惟王肅家語以爲少孔子五十歲蓋以韓詩外傳所載有孟嘗君受業事孟嘗君田文在戰國時故遷就其詞不知韓嬰所說每多牴牾安知孟

嘗不別有一人而必以爲戰國之田文且漢時亦有
孟嘗相距不更遠乎茲以閔氏宗譜爲主乃晉唐以
來相傳之舊本後之人議論紛紛亦可以知所折衷
矣道光壬辰嘉平月崇川後學馮雲鵬謹識

閔子書

崇川馮雲鶚校刊

上篇

閔損字子騫少孔子十五歲孔子曰孝哉閔子騫人不問於其父母昆弟之言不仕大夫不食汙君之祿如有復我者必在汶上矣

史記

閔損魯人少孔子五十歲以德行著名孔子稱其孝焉

家語

閔子騫始見於夫子有菜色後有芻豢之色子貢問曰子

始有菜色今有芻豢之色何也閔子曰吾出蕪葭之中入夫子之門夫子內切磋以孝外爲之陳王法心竊樂之出見羽蓋龍旂旃裘相隨心又樂之二者相攻胷中而不能任是以有菜色也今被夫子之教淺深又賴二三子切磋而進之內明於去就之義出見羽蓋龍旂旃裘相隨視之如壇土矣是以有芻豢之色詩曰如切如磋如琢如磨孟嘗君請學於閔子使車往迎閔子閔子曰禮有來學往教致師而學不能禮往教則不能化君也君所謂不能學

者也臣所謂不能化者也於是孟嘗君曰敬聞命矣明日
祛衣請受業詩曰日就月將

以上二條見韓詩外傳

閔子騫兄弟二人母死其父更娶復有二子子騫爲其父
御車失轡父持其手衣甚單父則歸呼其後母兒持其手
衣甚厚溫卽謂其婦曰吾所以娶汝乃爲吾子今汝欺吾
去無留乎子騫前曰母在一子單母去四子寒其父默然
故曰孝哉閔子騫一言其母還再言三子溫

子夏三年之喪畢見於孔子孔子與之琴使之弦援琴而

弦術術而樂作而曰先王制禮不敢不及也子曰君子也
閔子騫三年之喪畢見於孔子孔子與之琴使之弦援琴
而弦切切而悲作而曰先王制禮不敢過也孔子曰君子
也子貢問曰閔子哀不盡子曰君子也子夏哀已盡子曰
君子也賜也惑敢問何謂孔子曰閔子哀未盡能斷之以
禮故曰君子也子夏哀已盡能引而致之故曰君子也夫
三年之喪固優者之所屈劣者之所勉以上二條見說苑
孔子晝息於室而鼓琴焉閔子自外聞之以告曾子曰嚮

也。夫子之音。清徹以和。淪入至道。今也更爲幽沈之聲。幽則利欲之所爲發。沈則貪得之所爲施。夫子何所感而若是乎。吾從子入而問焉。曾子曰。諾。二子入問夫子。夫子曰。然。女是言也。吾有之。向見猫方取鼠。欲其得之。故爲之音也。女二人者孰識諸。曾子對曰。閨子。夫子曰。可與聽音矣。孔叢子。

閨子爲後母所苦。冬月以蘆花代絮。父知之。欲出後母子。審曰。母在一子單。母去三子寒。遂止。孝子傳。

閔子騫肥子貢曰何肥也子騫曰吾出見美車馬則欲之
入聞先生之言則又欲之兩心相與戰今先生之言勝故
肥

尸子

魯哀公問於孔子曰衛有惡人曰哀貽他是何人者也孔
子曰未言而信無功而親是必全才而德不形者也哀公
異曰以告閔子曰吾與孔子非君臣也德友而已矣

莊子

崔子渡河操閔子騫所作也崔子蚤失母後母嘗以其死
母名呼之不應輒笞之崔子乃以渡河爲辭繫石於腰自

沈而死

琴操

淮南子繆稱訓故心哀而歌不樂心樂而哭不哀夫子
曰絃則是也其聲非也高誘注閔子騫三年之喪畢授
琴而彈其弦是也其聲切切而哀

古者臣有大喪則君三年不呼其門已練可以弁冕服金
革之事君使之非也臣行之禮也閔子要絰而服事既而
曰若此乎古之道不卽人心退而致仕孔子蓋善之也

羊傳

何休注闕子審以孝聞善其服事外得事君之義致仕
內不失親親之恩言古者又孫順不訕其君也時賢多
以爲非唯孔子以爲是

孔子之作春秋也以爲見之空言不如行事博深切明故
子貢問子公肩子言其切而爲國家資也

春秋繁露

閔子書

崇川馮雲鵠校刊

中篇

閔子騫爲費宰問政於孔子子曰以德以法夫德法者御民之具猶御馬之有銜勒也君者人也吏者轡也刑者策也夫人君之政執其轡策而已子騫曰敢問古之爲政孔子曰古者天子以內史爲左右手以德法爲銜勒以百官爲轡以刑罰爲策以萬民爲馬故御天下數百年而不失善御馬者正銜勒齊轡策均馬力和馬心故口無聲而馬

應轡策不舉而極千里善御民者壹其法正其百官以均
齊民力和安民心故令不再而民順從刑不用而天下治
是以天地德之而兆民懷之天地之所德兆民之所懷其
政美其民而衆稱之今人言五帝三王者其盛無偶威察
若存其故何也其法盛其德厚故思其德必稱其人朝夕
祝之升聞於天上帝俱歆用永厥世而豐其年不能御民
者棄其德法專用刑辟譬猶御馬棄其銜勒而專用箠策
其不制也可必矣夫無銜勒而用箠策馬必傷車必敗無

德法而用刑辟民必流國必亡治國而無德法則民無修
民無修則迷惑失道如此上帝必以爲亂天道也苟亂天
道則刑罰暴上下相諛莫知念忠上下俱無道故也今人
言惡者必比之於桀紂其故何也其法不聽其德不厚故
民惡其殘虐莫不吁嗟朝夕祝之升聞於天上下不蠲降
之眚罰災害並生用殄厥世故曰德法者御民之本古之
御天下者以六官總治焉冢宰之官以成道司徒之官以
成德宗伯之官以成仁司馬之官以成聖司寇之官以成

義司空之官以成禮六官在手以爲轡司會均仁以爲納
故曰御四馬者執六轡御天下者正六官是故善御馬者
正身以總轡均馬力齊馬心回旋曲折唯其所之故可以
取長道赴急疾此聖人所以御天地與人事之法則也天
子以內史爲左右手以六官爲轡已與三公合執六官均
五教齊五法故亦唯其所引無不如志以之道則國治以
之德則國安以之仁則國和以之聖則國平以之禮則國
定以之義則國乂此御政之術也過失人情莫不有焉過

而改之是爲不適故官屬不理分職不明法正不一百事
失紀曰亂亂則飭冢宰地利不殖財物不蕃萬民饑寒教
訓不行風俗淫僻人民流散曰危危則飭司徒父子不親
長幼失序君臣上下乖離異志曰不和不和則飭宗伯賢
能而失官爵功勞而失賞祿士卒疾怨兵弱不用曰不平
不平則飭司馬刑罰暴亂姦邪不勝曰不義不義則飭司
寇度量不審舉事失理都鄙不修財物失所曰貧貧則飭
司空故御者同是車馬或以取千里或不及數百里其所

謂進退緩急異也夫治者同是官法或以致平或以致亂者亦其所以爲進退緩急異也古者天子常以季冬考德正法以觀治亂德盛者治也德薄者亂也故天子考德則天下之治亂可坐廟堂之上而知之夫德盛則法修德不盛則飭法與政咸德而不衰故曰王者又以孟春論吏之德及功能能德法者爲有德能行德法者爲有行能成德法者爲有功能治德法者爲有智故天子論吏而德法行事治而功成夫季冬正法孟春論吏治國之要

家語

閔子騫

崇川馮雲鵲校刊

下篇

閔子騫問孔子曰道之與孝相去奚若孔子曰道者自然之妙用孝者人道之至德夫其包運天地發育萬物曲成萬類不希性壽其功至實而不爲物府不爲事官無爲功尸捫求視聽莫得而有字之曰道用之於人字之曰孝孝者善事父母之名也夫善事父母敬順爲本意以承之順承顏色無所不至發一言舉一意不敢忘父母營一手措

一足不敢忘父母事君不敢忘忠朋友不敢不信臨下不
敢不敬嚮善不敢不勤雖居獨室之中亦不敢懈其誠此
之謂全孝故至誠之至通於神明光於四海有感必應善
事父母之所致也昔者虞舜其大孝矣庶母惑父屢憎害
之舜心益恭懼而無怨謀使浚井下土實之於是天休震
動神明駭赫導穴而出奉養滋謹由是元德茂盛爲天下
君善事父母之所致也文王之爲太子也其大老矣朝夕
必至乎寢門之外問寺人曰茲日安否如何曰安太子溫

然喜色小不安節太子色憂滿容朝夕食上太子必視寒
煖之節食下必知膳羞所進然後退寺人言疾太子肅冠
而齋膳宰之饌必敬視之湯液之貢必親嘗之嘗饌善則
太子亦能食嘗饌寡太子亦不能飽以至於復初然後亦
復初君后有過怡聲以諷君后所愛雖小物必嚴翼是故
孝成於身道治天下雅曰文王陟降在帝左右言文王靜
作進退天必贊之故紂不能害寡啓之壽卜世三十十年
七百年所命也善事父母之所致也閔子騫曰善事父母

之道既幸聞矣敢問教子之義孔子曰凡三王教子必視禮樂樂所以修內禮所以修外禮樂交修則德容發輝於貌故能溫容而文明夫爲人臣者殺其身有益於君則爲之況利其身以善其君乎是故擇建忠良貞正之士爲之師傅欲知其父子君臣長幼之道夫知爲人子然後可以爲人父知爲人臣然後可以爲人君知事人然後能使人此三王教子之義也閔子憲退而事之於家三年人無間於父母昆弟之言交遊稱其信鄉黨稱其仁宗族稱其弟

德行之聲溢於天下此善事父母之所致也

亢倉子

陳羣曰閔子騫爲人上事父母下順兄弟動靜盡善故人不得有非閔之言也

顏延之曰言之無間謂盡美也

論語稽求篇按不間句有二說後漢陳羣係陳仲弓之孫其釋有此云閔子行孝動靜盡善人于其父母昆弟間所言無可非閔此言閔子言善人自服之此一說也又范升九歲能通論語其奏記王邑有曰升閔子以人

不問於其父母兄弟爲孝臣以下不非其君上爲忠劉
昭註此謂閔子行孝父母昆弟皆化之故人無毀言此
又一說也據韓詩外傳稱閔子後母曾虐視閔子父欲
出母而閔子留之其子父母昆弟間不無可議故舊解
如此陳氏數世孝友范升一代儒術其兩說雖不盡同
然俱有義理不然只一言字亦知其所言何事而曰無
異詞是必加以稱其孝友四字則又添出矣

閔子書

崇川馮雲鵬校刊

祠墓古蹟

先賢閔子廟在濟南府城鐘樓寺街一在城東五里墓前
宋熙寧七年建蘇轍作記蘇軾書碑

先賢閔子墓在歷城東五里宋熙寧七年建祠墓前一在
范縣東南三十里孟村一在曹州古乘氏縣城內一在江
南宿州北七十里壽山之陽

閔子祠一在費縣東北王溝村一在沂水縣西北九十里

相傳爲閔子騫避季氏處祠旁有子路讀書臺因並祀之
爲二賢祠

以上三條見山東通志

先賢閔子祠在宿州北七十里閔子鄉之騫山南一在蕭
縣城南閔子村一在丹徒太乙都

三賢祠在蕭縣白茅山祀閔子子張顏率

先賢閔子墓在宿州北七十里閔子鄉騫山前墓前有祠
按家語閔子魯人卒葬歷城東五里明一統志載在蕭縣
今姑從舊志存之

以上三條見江南通志

先賢閔子墓在濟南府城東北十五里華不注山下明開
小清河於山下得石棺啓之有詩云孝哉閔子寢死後塋
黃泉幸遇黃太守起我在高原是時董濬河之役者黃鐘
也黃因起而塋之高原去縣三里許是爲今墓其石棺尚
在華不注之麓劉勅爲之記

齊州閔子廟記事

明陳經邦閔氏家乘序按一統志閔子墓在歷城東五
里濮陽李肅之守濟南立廟蘇轍撰碑則閔子斷爲魯
人而汶上書院有自來已今宿州北七十里有閔子鄉

有騫山則漢金城騫包是也蕭縣東南八十里有閔子
墓則漢閔仲叔是也范縣南十四里有閔子墓則五代
閔子塞是也

閔孝里在歷城東五里

齊州記事

閔公山在汶上縣

閔子避名處在汶上縣

閔子書院在濟南府城內有講堂三楹有司以朔望日講
孝經廂二一曰閭閻齋一曰蘆花館青衿有志者卒業其

中

祭田明崇禎五年撥給閔氏祭田四十八頃坐落濟寧州南鄉新店地方運河南岸立有碑記每畝收市斗一斗永不起科以供祭祀

以上四條見閔子家乘

明張翼明記聖門之閔氏先後與大舜相輝映而三齊首郡墳壟在焉百世之祀宜也夫閔子能以大義辭季氏之費而不能避蘆花之寒能以片言寢長府之工而不能止絮溝之洗良以絮卽單寒決不至死而母氏有

悔悟之日則父子兄弟如初耳此與舜盡事親之道有二哉齊人知祀舜又烏得不祀閔也

寒山鞭蘆在蕭縣南三十里堀坊村西北八里閔子迫於後母衣以蘆花爲父御車因寒失韉掣牛而覆父鞭之衣破敗絮見風捲如雪父撫之憐甚因名摸兒寒山至今有腰疼堆凡登山力倦遠行腰疼者負石擲此疼卽止一名

掣牛阪

堀坊志

閔子書

崇川馮雲鵷校刊

宗子世表

二代法生三子曰履日向曰高田和王齊向以諸生仕
齊

三代履生子劬

四代劬生子稚

五代稚生二子曰敬曰南魯傾公十九年楚取徐州敬

去琅邪南去范

六代敬生子維

七代維生二子曰郇曰郈

八代郈居孔里生子平

九代平生子論

十代論生子儀

十一代儀生子遵

十二代遵漢武帝時從河間獻王遊後爲昭帝博士生

子襄

十三代襄生子子虞

十四代子虞生子超

十五代超生三子曰成曰文曰憲

十六代成生二子曰道立曰道宏道宏爲明帝孝經師

十七代道立生子崇

十八代崇生二子曰然曰浩曹操爲兗州太守徵魯閔

浩不至徙廣陵

十九代然生子表占

二十代表占生子蘊

二十一代蘊生二子曰鳧曰鴻鴻爲晉惠帝時五雋之

一仕至尚書

二十二代鳧生子叔夏

二十三代叔夏生子瞻

二十四代瞻生子研

二十五代研生二子曰淇曰潢

二十六代淇生二子曰勛曰亮

二十七代勛如魏都生子衢

二十八代衢如齊生二子曰恂曰忱

二十九代恂生子望之

三十代望之生子莘

三十一代莘隨大業初如隨都生子銑

三十二代銑生二子曰德監曰德餘

三十三代德監生二子曰相曰玉相在魯玉爲歙州刺

史

三十四代相生子思

三十五代思生子恂

三十六代恂生子連

三十七代連生子如京

三十八代如京生三子曰宗周曰宗孔曰宗羲

三十九代宗周生子振

四十代振生子正

四十一代正宋大中祥符二年奉祀補太廟齋郎生二

子曰希惠曰希聲

四十二代希惠生子師望

四十三代師望生子載言

四十四代載言生子采輝

四十五代采輝生子襄隨康王南渡

四十六代襄生子憲洪

四十七代憲洪生子景行

四十八代景行生子文煨

四十九代文焜生子謙

五十代謙生子含美

五十一代含美生二子曰定曰賓

五十二代定生子子京

五十三代子京元學博隱居教授生三子曰伯友曰伯

倫曰伯卿

五十四代伯友生子子援

五十五代子援明洪武時爲教授生子公尚

五十六代公尚生子彥從

五十七代彥從生子顯通

五十八代顯通景泰二年詔聖賢子孫免役復業顯通
在蕭縣奉祀既而返歛生子祥主

五十九代祥主生子三茅

六十代三茅生子壽保擢至曲阜復業寄籍濟寧州

六十一代壽保嘉靖元年充濟南府奉祀求博士未果

生子時茂

六十二代時茂生子邦魯

六十三代邦魯生二子曰煒曰煌

六十四代煒濟寧州庠生生子衍籀

六十四代煌補充四氏學奉祀生

國朝康熙三十八年閔煌援例陳情經

廷臣議准爲先賢閔子設立博士查閔煌之先世自魯遷

歙復自歙遷濟寧世爲主祀其兄閔煒有子衍籀

係嫡裔於康熙三十九年奉

旨授閩衍籍爲翰林院五經博士世襲主祀

六十五代衍籍康熙三十九年五月承襲翰林院五經
博士主奉祀事生子興汶

六十六代興汶康熙四十年三月承襲翰林院五經博
士主奉祀事生子克峻

六十七代克峻乾隆三十八年八月承襲翰林院五經
博士主奉祀事生子傳基

六十八代傳基字光業乾隆五十年考職未襲卒生子

繼堃

六十九代繼堃字敬亭未襲卒生子廣源

七十代廣源字獻泉嘉慶六年三月承襲翰林院五經博士主奉祀事生子昭榆

七十一代昭榆字昌齡道光十一年正月承襲翰林院五經博士主奉祀事生子

先賢冉子傳二

先賢冉子名雍字仲弓魯人高辛氏之後伯牛之宗族也
少孔子二十九歲生於周景王之二十二年以德行著名
嘗問於夫子曰雍聞至刑無所用政至政無所用刑至刑
無所用政桀紂之世也至政無所用刑成康之世也信乎
孔子曰聖人之治化也必刑政相參焉太上以德教民以
禮齊之其次以政導民以刑禁之刑者成也一成而不可
更故君子盡心焉他日爲季氏宰問政子曰先有司赦小

過舉賢才孔子謂其可使南面子貢曰在貧如客使其臣
如借不遷怒不復怨不錄舊非是冉雍之行也孔子論其
材曰有土之君子也有衆使也有刑用也然後稱怒焉孔
子告之以詩曰靡不有初鮮克有終匹夫不怒惟以亡其
身今仲弓墓有二一在曹縣東南五十里俗呼爲冉垌一
在冠縣北二十五里未知孰是唐元宗時從祀封薛侯宋
封下邳公加封薛公明嘉靖九年改稱先賢冉子

闕里志

皇侃云仲弓父劣當時不用故孔子明言之也辟如仲弓

之賢若遭明王之主不用爲諸侯乎故鯀則殛死禹乃嗣興也

不佞之人具體之賢登彼堂奧用之山川代逢偃革禮畢升煙錫以三壤賁茲九泉

宋王欽若贊

謹按山東通志載冉子仲弓生於周景王二十二年而冉子世系譜則以爲敬王四年蓋通志依家語以爲少孔子二十九歲而冉譜謂敬王四年時孔子已三十六歲矣二者必有一誤然家譜世守當必有所

本也又素王世紀景王二十二年弟子冉有生是二冉同歲與譜不合姑闕疑焉可也道光壬辰嘉平月崇川後學馮雲鵠謹識

冉子書

崇川馮雲鶴校刊

上篇

冉氏之先爲少昊金天氏之裔數十傳至周曹叔振鐸始
封於曹爲曹伯又封曹侯都於曹及其薨也塋於陶邱振
鐸生子太伯脾襲曹侯爵太伯脾生五子曰明曰渥曰澤
曰潤曰波明早夭渥襲曹侯澤封陶子潤封原伯波封濟
伯又封濟源公澤以周宣王之四年生二子曰肅曰端端
仕於宣王爲宗伯居豐鄩又攝司馬爲大戎所殺生畢夷

畢夷三世至洗心乃定王時生也至簡王時晉悼公伐戎
徵兵於曹靈王時又欲伐戎徵兵於曹民不堪命陶子患
之與濟侯原伯東會於囂陽計未定陶子之臣曰非子引
宋師乘虛襲破之時洗心奔魯魯公妻之生魯子魯子業
儒南宮氏以女妻之生子曰離魯有齊禍離奉南宮氏逃
居於蒗澤之陽家貧以牧爲業有勸之仕者離曰山川不
靈吾豈其犧故人稱犁牛氏其歌曰春日陽陽河水蕩蕩
春蒐萋萋所牧茁茁長離初娶顏氏景王二十二年生耕字

伯牛敬王四年生雍字仲弓顏氏卒又娶公西氏生求當
離之娶公西氏時年已四十有四禱於天曰願天早賜子
以奉公西氏遂齋宿於壇是夜夢有金冠紅袍之神執簡
向公西氏曰有子冉冉求而得之有子冉冉學而仕之至
期年生子因名之曰求字子有乃敬王十六年事也旋以
冉爲姓公西氏聞孔子設教於闕里命三子往從學焉
冉雍字仲弓周敬王四年二月初二日生娶曾氏乃曾皙
之女曾參之妹生二子曰孟曰季仲弓在孔門以德行著

居敬存帝王欽翼之旨行簡傷輓近煩擾之類嘗從孔子
適衛孔子曰雍可仕矣山川其舍諸及往見祝鮀鮀與之
言雍但唯唯鮀病其短才或人以告孔子曰焉用佞乎後
歸魯嘆曰不有祝鮀之佞難乎免於世矣卒葬曹州東南
六十里冉堦建祠合祀故里在曹州東十五里冉村鎮建
祠專祀漢高祖過魯以太牢祀孔子又命分祀孔門諸弟
子封雍爲陶子至元帝遣劉更生加封陶侯

以上二條見

冉子世系譜

元姚樞序云冉氏系出於周曹叔振鐸數傳至冉離生
三子長冉耕次冉雍次冉求蓋同父兄弟也而兗州州
縣誌又稱一族三賢與冉譜所載微屬不合大約事隔
千餘年魯魚亥豕訛不一或者譜詳而誌畧亦未可
知按舊譜冉耕冉雍冉求三賢同居冉山後名冉堦廟
墓俱在三冉合爲一譜志本源也至五世後子孫蕃衍
散居四方難以徧紀遂合族公議各本其祖別爲一譜
有事則各執譜以相符焉

謹按漢書少昊帝考德曰清黃帝之子清陽也其子
孫名摯以金德王天下號曰金天氏帝王世紀曰少
昊姬姓卽白帝朱宣山海經少昊生倍伐處緡淵生
般始爲弓矢而春秋命歷序云少昊傳八世其詳不
可得聞史記世家載曹叔振鐸者周武王母弟也武
王克殷封叔振鐸於曹宋衷以爲濟陰定陶是也叔
振鐸卒子太伯脾立太伯子仲君平平子宮伯侯侯
子孝伯雲雲子夷伯喜夷伯二十三年周厲王奔於

巍然則太伯脾之子爲仲君平並無渥澤潤波之說
其後亦無畢夷洗心之事意者支庶分封史冊所未
詳乎第世系譜所載與東原志冉氏族譜不同當各
有所本未可軒此而輕彼也道光壬辰嘉平月崇川

後學馮雲鵬謹識

冉雍字仲弓仲弓問政孔子曰出門如見大賓使民如承
大祭在邦無怨在家無怨孔子以仲弓爲有德行曰雍也
可使南面仲弓父賤人孔子曰犁牛之子騂且角雖欲勿

用山川其舍諸

史記

冉雍伯牛之宗族少孔子三十九歲生於不肖之父以德

行著名孔子稱其可使南面

家語

仲弓鉤文在手是謂知始

論語摘輔象

淮南子說山訓事或不可前規物或不可慮卒然不戒
而至故聖人畜道以待時凱屯犁牛旣耕以糝決鼻而
羈生子而犧尸祝齊戒以沉諸河河伯豈蓋其所從出
辭而不享哉

說苑孔子曰可也簡簡者易野也易野者無禮文也孔子見子桑伯子子桑伯子不衣冠而處弟子曰夫子何爲見此人乎曰其質美而無文吾欲說而文之孔子去子桑伯子門人不說曰何爲見孔子乎曰其質美而文繁吾欲說而去其文故曰文質修者謂之君子有質而無文謂之易野子桑伯子易野欲同人道於牛馬故仲弓曰太簡上無明天子下無賢方伯天下爲無道臣弑其君子弑其父力能討之討之可也當孔子之時上無

明天子也故言雍也可使南面南面者天子也雍之所
以得稱南面者問子桑伯子於孔子孔子曰可也簡仲
弓曰居敬而行簡以道民不亦可乎居簡而行簡無乃
太簡乎子曰雍之言然仲弓通於化術孔子明於王道
而無以加仲弓之言

冉子書二

紫川馮雲鵬校刊

下篇

仲弓問於孔子曰雍聞至刑無所用政至政無所用刑至刑無所用政桀紂之世是也至政無所用刑成康之世是也信乎孔子曰聖人之治化也必刑政相參焉太上以德教民而以禮齊之其次以政焉導民以刑禁之刑不刑也化之弗變導之弗從傷義以敗俗於是乎用刑矣顓五刑必卽天倫行刑罰則輕無赦刑惻也惻成也壹成而不可

更故君子盡心焉仲弓曰古之聽訟尤罰麗於事不以其
心可得聞乎孔子曰凡聽五刑之訟必原父子之情立君
臣之義以權之意論輕重之序慎測淺深之量以別之悉
其聰明正其忠愛以盡之大司寇正刑明辟以察獄獄必
三訊焉有指無簡則不聽也附從輕赦從重疑獄則泛與
衆共之疑則赦之皆以小大之比成也是故爵人必於朝
與衆共之也刑人必於市與衆棄之也古者公家不畜刑
人大夫弗養也士遇之塗以弗與之言屏諸四方唯其所

之不及與政弗欲生之也仲弓曰聽獄獄之成成何官孔子曰成獄成於吏吏以獄成告於正正既聽之乃告大司寇聽之乃奉於王王命三公卿士參聽棘木之下然後乃以獄之成疑於王王三宥之以聽命而制刑焉所以重之也仲弓曰其禁何禁孔子曰巧言破律遁名改作執左道以亂政者殺作淫聲造異服設伎奇器以蕩上心者殺行僞而堅言詐而辯學非而博順非而澤以惑衆者殺假於鬼神時曰卜筮以疑衆者殺此四誅者不以聽仲弓曰其

禁盡於此而已孔子曰此其急者其餘禁者十有四焉金
服命車不粥於市珪璋璧琮不粥於市宗廟之器不粥於
市兵車旂旗不粥於市犧牲秬鬯不粥於市戎器兵甲不
粥於市用器不中度不粥於市布帛精麤不中數廣狹不
中量不粥於市姦色亂正色不粥於市文錦珠玉之器雕
飾靡麗不粥於市衣服飲食不粥於市果實不時不粥於
市五木不中伐不粥於市鳥獸魚鼈不中殺不粥於市凡
執此禁以齊衆者不赦過也

家語

仲弓問古之刑教與今之刑教孔子曰古之刑省今之刑繁其爲教古有禮然後有刑是以刑省今無禮以斂而齊之以刑刑是以繁書曰伯夷降典折民維刑謂先禮以教之然後繼以刑折之也夫無禮則民無恥而正之以刑故民苟免

書曰哀矜折獄仲弓問曰何謂也孔子曰古之聽訟者察貧窮哀孤獨及鰥寡老弱不肖而無告者雖得其情必哀矜之死者不可生斷者不可屬若老而刑之謂之悖弱而

刑之謂之剋不赦過謂之逆率過以小罪謂之枳故宥過赦小罪老弱不受刑先王之道也書大辟疑赦又曰與其殺不辜寧失不經

以上二條見孔叢子

子貢對衛將軍文子曰在貧如客使其臣如藉不遷怒不探怨不錄舊罪是冉雍之行也孔子曰有土君子有衆使也有刑用也然後怒匹夫之怒惟以亡其身詩云靡不有初鮮克有終以告之

大戴禮記

盧辯注冉雍魯人也字仲弓冉求字子有冉雍之子爲

季氏之宰

驪軒孔氏云冉有仲弓之族按古家語及弟子傳冉有仲弓並少孔子二十九歲明非父子也注誤

孫星衍記孔子四科列仲弓爲德行問仁問政則告以邦家無怨赦過舉賢僅僅爲季氏宰欲使南面臨民孔叢載仲弓兩問惟刑教折獄爲兢兢是仲弓固以德行為兼通政事者鄭康成序論語以爲仲弓與子游子夏等撰定是又兼言語文學之長四科幾一人兼之

景公問晏子曰吾欲善治齊國之政以干霸王之諸侯晏子作色對曰官未具也臣數以聞而君不肯聽也故臣聞孔子居處情倦廉隅不正則季次原憲侍氣鬱而疾志意不通則仲由卜商侍德不盛行不厚則顏淵鶩雍侍今君之朝臣萬人兵車千乘不善政之所失於下實墜下民者衆矣未有能士敢以聞者臣故曰官未具也

晏子春秋

孔子出遊憩於道旁令子路取水遇一虎吨水子路撩衣向前擊虎扯其尾牛截虎奔去時伍員逃難在塗見之駐

馬問子路答之邂逅相識接見孔子孔子告之曰吾門弟子冉仲弓仕魯可以主之時仲弓遇盜跖展雄縛之伍員至得釋後投魯仲弓力薦於魯君少正卯沮之少正卯既誅定公以伍員爲司馬夾谷之會伍員斬侏儒退姜鐸兵齊人歸女樂伍員請往他國許之歸至仲弓之舍仲弓贈之遂入宋

陳器五寶故事

昔孔子既汲仲弓之徒追論夫子之言謂之論語

傳子

冉子書二

崇川馮雲鵠校刊

祠墓古蹟

先賢冉子仲弓祠在曹州府城東十五里冉村鎮一在曹縣東北冉堦集廟後有墓宗子博士主祀一在冠縣北二十里有冉薛公祠明彭時有記

先賢冉子仲弓墓在曹縣東北五十里俗名冉堦一在冠縣西北二十里王段村

以上二條見山東通志

冉子仲弓故里在曹州東十五里冉村鎮建祠專祀

冉子仲弓墓在曹州東南六十里冉堦村
以上二條見冉子世系譜

冉子仲弓墓在冠氏縣北二十五里

元和志

冉子墓在冠縣西北二十里墓前有祠創自宋元正德八年副使王金重修曹縣東北五十里亦有仲弓墓俗呼爲冉堦一統志兩存之

東昌府志

孫星衍記古有族塋之法今伯牛塋在東平冉子有塋在鄆城仲弓以魯人塋在晉冠氏未詳其故

文山舊傳曾子與冉子會文處冉子兄弟三人居冉山下
與顏子閔子端木子言子曾子有子仲子公西子原子宓
子宰子卜子林子琴子顓孫子南宮子十六人相友善曾
子家居南武城嘗與諸子西會於文邱執文講業既而嘆
曰以文會友以友輔仁君子哉遭秦燔書坑儒者四百六
十餘人始皇東行郡縣至闕里毀孔子故宮及諸弟子祠
埋其像焚其書業儒者不辨真偽悉坑之時冉氏子孫仲
弓子有之後冉恂冉慄冉厚與承乾遵先仲孫東景際運

等八人皆坑死漢高祖起兵滅秦駐蹕吉旺里練士卒於
冉山之南天下既定乃陞吉旺里爲武成縣改文山爲文
亭山爲邑之鎮山曾子冉子會文處皆隸曹境

世系譜

冉子書二

崇川馮雲鵷校刊

宗子世表

二代孟周元王時生業儒爲泗水司教生二子昭明

三代昭威烈王時生爲東陽守生三子再爵再貴再錫

四代再爵慎觀王時生爲齊東子生子其實

五代其實生子盈

六代盈東周時生生子慄

七代慄秦始皇時坑死生子夢樓

八代夢樓始皇時諸儒皆變姓名逃竄他方夢樓改姓樓逃淄川生子思魯

九代思魯一名樓思魯生子敦

十代敦漢高祖時回蒗陽故里生子賢

十一代賢生子大才

十二代大才生子宗

十三代宗生子先誠

十四代先誠生子聯芳

十五代聯芳生子炎

十六代炎生子萬祚

十七代萬祚生子習孔

十八代習孔元帝時爲儒官奉祀生子信

十九代信生子承命

二十代承命生子重新

二十一代重新生子結

二十二代結生子夫儒

十三
二十三代夫儒生子傳

二十四代傳生子學

二十五代學生子邇

二十六代邇生子錫民

二十七代錫民生子庭

二十八代庭生子久在

二十九代久在生子櫝

三十代櫝家貧依同里姻曹人卞壺晉咸和二年蘇峻

攻青溪柵櫓與壺俱赴敵死生子子書

三十一代子書生子可懷

三十二代可懷無子以冉平子壬爲嗣

三十三代壬生子友卜

三十四代友卜唐太宗徵天下名儒以友卜爲國學生

員王師旦知貢舉友卜成進士孔穎達觀冉譜嘆曰

讀我孔譜則知我孔澤之遠暨觀冉譜則知冉澤亦

遠生子宗周

三十五代宗周貞觀十五年詔賜生員衣巾奉祀生子

從詔

三十六代從詔生子岐產

三十七代岐產無子以從誥孫憲爲嗣

三十八代憲生子應謹

三十九代應謹生子志道

四十代志道生子章

四十一代章生子建節

四十二代建節生子午

四十三代午生子合時黃巢在曹州開元寺造反諸冉子孫見幾而去棄故里者多

四十四代合生子輝

四十五代輝貢生宋太祖時爲宜春縣令生子宅仁

四十六代宅仁生子澄時

四十七代澄時眞宗乾興四年澄時敦請曹人張齊賢定再譜宗系曰喜有慶患則感家人也喜不慶患不

感塗人也聞喜不慶聞患不感塗人異乎家人也喜則慶焉患則感焉家人異乎塗人也觀譜則識不遺家人矣又仁宗景祐元年孔道輔修孔譜澄時携譜至曲阜互相參準判冉譜曰忠孝一道也使人識立譜之意則知事君之忠矣故曰求忠臣於孝子之門生子聚

四十八代聚生子良棟

四十九代良棟生子雲鵬

五十代雲鴻生子樂

五十一代樂生子諫

五十二代諫生子蔚

五十三代蔚生子劔化

五十四代劔化生子軒時有郎中姚樞隱於薊門劔化

子軒請修再譜

五十五代軒生二子邦仁玘

五十六代邦仁元文宗時金履祥乞再譜觀之遂筆曰

聖賢之功德垂萬世而不朽聖賢之子孫歷萬代而
象賢生子克岐

五十七代克岐生子廷召

五十八代廷召生子允結

五十九代允結生子元福

六十代元福生子大經大綸

六十一代大經生子一周一皐

六十二代一周生子永吉

六十三代永吉生子國

六十四代和國生子春芳

六十五代春芳生二子秋桂秋楷

六十六代秋桂字清馨生子天琳

六十七代天琳雍正二年三月恭逢

臨雍盛典

詔爲先賢冉子仲弓設立五經博士經山東巡撫塞楞額
查明天琳委係嫡裔雍正六年七月具題奉

年二
旨授爲翰林院五經博士世襲主祀生子上成

六十八代上成字九升乾隆十二年十月承襲翰林院
五經博士主奉祀事生子繼先

六十九代繼先字紹基乾隆四十四年考職未襲卒生
子廣淇

七十代廣淇字竹溪乾隆六十年九月承襲翰林院五
經博士主奉祀事生子昭同

七十一代昭同字心齋嘉慶二十四年二月承襲翰林

院五經博士主奉祀事生子憲賓